

10 AUG 1998

DR MAHATHIR LAWAT LABUAN DAN SABAH MINGGU INI

KOTA KINABALU, 10 Ogos (Bernama) -- Perdana Menteri Datuk Seri Dr Mahathir Mohamad akan mengadakan lawatan selama tiga hari ke Wilayah Persekutuan Labuan dan Sabah mulai Khamis ini.

Beliau dan isteri Datin Seri Dr Siti Hasmah Mohd Ali, dijadual tiba di Labuan pada petang Khamis dan akan menghadiri majlis makan malam dengan pemimpin-pemimpin Barisan Nasional (BN) Labuan.

Majlis itu akan diikuti dengan perjumpaan tertutup oleh beliau dengan pemimpin Umno di pulau itu, menurut kenyataan Jabatan Penerangan Malaysia Labuan hari ini.

Pada pagi Jumaat, Dr Mahathir akan meninjau dan mendengar taklimat mengenai projek pembangunan di sekitar pulau Pusat Kewangan Luar Pesisir Antarabangsa itu termasuk terminal baru lapangan terbang Labuan.

Beliau akan berlepas ke sini petang Jumaat untuk merasmikan Kongres Parti Demokratik Sabah (PDS), sebuah parti komponen BN Sabah dan kemudian menghadiri satu majlis makan malam bersama pemimpin negeri ini.

Pada pagi keesokan harinya, Dr Mahathir akan berucap di majlis pemimpin bersama rakyat di Kompleks Sukan Likas dekat sini dan kemudian merasmikan kongres Parti Liberal Demokratik (LDP), sebuah lagi komponen BN negeri.

Dr Mahathir dijangka berlepas pulang ke Kuala Lumpur pada sebelah petangnya.

-- BERNAMA

JS WAT